

四庫全書

子部

欽定四庫全書

古今事文類聚後集卷六

宋 祝穆 撰

人倫部

教子

父教 母教
教姪 見姪門

羣書要語教誨爾子式穀似之小宛教者必以正 古者

易子而教之 父子之間不責善責善則離離則不祥

莫大焉

並離
妻下

父詔其子兄詔其弟

莊子

百世小人知讀論

語孝經尚為人師雖千載冠冕不曉書記者莫不耕田

養馬若能保數百卷書終不為小人也諺曰積錢千萬

無過讀書

顏氏家訓詳闕閱子弟門

禁童子之暴謔則師友之誠不

如傳婢之指揮止凡人之鬪閱則堯舜之道不如寡妻

之誨諭

同上

詩句失學從兒懶

杜

過子詩似翁我唱兒輒酬

坡

小兒

弄筆不能噴浣壁書窓且賞勤

錫

閒來案上翻墨汁塗

抹詩書如老鴉

盧全

先生堂前霜月苦弟子讀書喧兩廡

坡

古今事實

學詩學禮

以下係
父教

孔子嘗獨立鯉趨而過庭曰學詩乎對曰未也曰不學
詩無以言鯉退而學詩他日又獨立鯉趨而過庭曰學
禮乎對曰未也曰不學禮無以立鯉退而學禮

教以義方

衛莊公之子州吁有寵而好兵公弗禁石蜡諫曰臣聞

愛子教之以義方不納於邪

教忠

晉懷公命無從亡人期期而不至無赦狐突之子毛及偃從重耳在秦弗召懷公執狐突曰子來則免對曰子之能仕父教之忠古之制也策名委質貳乃辟也今臣之子名在重耳有年數矣若又召之教之貳也父教子貳何回事君乃殺之

不食示訓

見子孫門

教子一經

韋賢字長孺子玄成字少翁俱以明經位至丞相故語
曰遺子黃金滿籬不如教子一經 齊柳世隆盛事墳
典張緒曰觀君舉措當以清名遺子孫耶荅曰一身之
外亦復何須子孫不才將為爭府如其才也不如一經
教詔

陳萬年子咸數言事譏刺近臣萬年病召咸戒床下語
至半夜咸睡頭觸屏萬年大怒曰乃公教戒汝汝反不

聽何也咸曰具曉所言大要教咸諂也萬年乃不復言

戒子承家

鄭玄以書戒子益恩曰入此歲來已七十矣家事大小汝一承之家今頗多於昔勤力務時無恤饑寒非飲食薄衣服尚可令吾寡恨

子各通經

鄧禹有十三男各命通一經 晉劉殷有七子五子皆授一經一子授太史公一子授漢書

怒其驕傲

顏延之嘗早詣竣見賓客盈門竣尚未起延之怒曰汝出糞土之中升雲霞之上遽驕傲如此其能久乎

屏風書誠

房玄齡恐諸子驕侈集古今家誠書為屏風令各取一具曰留意於此足以保躬矣

居家有法

柳公綽最名有家法中門東有小齋自非朝謁之日每

平旦輒出至小齋諸子仲郢皆束帶晨省於中門之北
公綽決私事接賓客與弟公權及羣從弟再會食自旦
至暮不離小齋燭至則命子弟一人執經史躬讀一過
乃講議居官治家之法或論文或聽琴至於定鍾然後
歸寢諸子皆昏定於中門之內

已肉子蔬

五代唐劉贊父玘為縣令贊始就學衣以青布衫襦每
食則自肉食別以蔬食食贊牀下曰肉食君之祿也爾

欲之則勤學以干祿吾食非爾之食也由是贊力學舉進士

戒子安分

韓忠憲戒其子曰窮達禍福固有定分枉道以求之徒喪所守切勿為也余以孤忠自信未嘗有因緣憑藉而每遭人主為知己今忝三公所恃者公道與神明而已焉可誣也唐介一日自政府歸語諸子曰吾備位政府知無不為桃李固未嘗與汝栽培而荆棘則甚多矣

然汝等窮達亦自有命惟安分自勉而已

燕客索杖

韓忠憲億教子嚴肅知亳州第二子舍人自西京倅謁告省覲康公與右相及姪柱史宗彥皆中甲科歸公喜置酒召僚屬之親厚者俾諸子坐於席隅惟持國多深思知必有義方之訓託疾不赴坐中忽云二郎吾聞西京有疑獄奏讞者其詳云何舍人思之未得已訶之再問未能對遂推案索杖大詬曰汝食朝廷厚祿倅貳一

府事無巨細皆當究心大辟奏案尚不能記則細務不舉可知吾在千里無所干預猶能知之爾叨冒廩祿何顏報國必欲捷之衆賓力解方已諸子股栗家法之嚴如此所以多賢子孫也忠憲八子曰綱綜絳繹緯縝維
縞絳縝皆宰相維門下侍郎

教子毋誑

司馬公云光五六歲弄胡桃女兄欲為脫其皮不得女兄去一婢以湯脫之女兄復來問脫胡桃者光曰自脫

也先君適見之訶曰小子何得漫語自是不敢漫語後公以誠授學者曰從不妄語入是也

責子不賢

見父子門

戒婢往來

丁彥輔云予昔官洛陽有外醫媼張氏公卿士人家無不到說富鄭公治家嚴肅有二子舍凡使女僕輩戒不得互相往來閨門肅如也

史麈

三徙擇隣

以下係母教

孟軻母其舍近墓孟子少嬉遊於墓間為其事母曰此非所以處子也乃去舍市傍其嬉戲為賈人銜賣之事又曰此非所以處子也復徙舍學宮之傍其嬉戲乃設俎豆揖遜進退母曰此真可以居吾子遂居焉

列女傳

買肉教信

孟子少時聞東家殺猪問母何為曰欲啖汝既而母悔曰吾嘗教以割不正不食席不正不坐今適有知而欺之是教之不信也乃買隣猪肉以食之

韓詩外傳

斷機勉學

孟母三徙居孟子學而歸母問學所至孟子自若也孟母以刀斷機曰子之廢學若吾斷機織孟子懼勤學不息遂成名儒

不受魚鮓

吳孟仁為鹽池司馬自能結網手捕魚作鮓寄母母還之曰汝為魚官而以鮓寄我非所以避嫌也

不受蚶鮓

陶侃為潯陽縣吏嘗監魚梁以一蚶鮓遺母湛氏母封還其鮓更貽書責之曰汝為吏以官物遺我非惟不能益吾反以增吾憂矣

壯猶捶撻

王大司馬母魏夫人性甚嚴王在湓城時為三千人將年踰四十少不如意猶捶撻之故能成其勲業

顧氏家訓

筭金易書

唐孟昌王弟勣智湛入朝位驍騎大將軍其子昭好學

有鬻異書者母顧筭中金曰何愛此不使子有異聞乎
遂持易之

入仕欲貧

崔元暉為軍校員外郎母盧氏戒之曰吾見辛玄馭云
兒子從官者聞有人來云貧乏不能自存此是好消息
吾聞貨資充足衣馬輕肥此是惡消息吾重此言汝今
坐食俸祿若不能忠清何以戴天履地須特加修潔勿
累吾此意也

職官
分紀

內訓甚嚴

呂榮公希哲字原明中國正獻公之長子正獻公居家
簡重寡默不以時事經心而申國夫人性嚴有法雖甚
愛公然教公事事循蹈規矩甫十歲祁寒盛暑侍立終
日不命之坐不敢坐也日必冠帶以見長者平居雖甚
熱在父母長者之側不得去中襪縛袴衣服唯謹行步
出入無得入茶肆酒肆市井里巷之語鄭衛之音未嘗
一經於耳不正之書非禮之色未嘗一接於目正獻公

與申國夫人教訓之嚴如此故公德器大異於人

秤槌投足

寇萊公準少時不脩小節頗愛飛鷹走犬太夫人性嚴每不勝怒舉秤槌投之中足流血由是折節從學及貴母已亡每捫其瘡痕輒哭

郡記聞

杖碎金魚

陳堯咨善射號小由基及守荆南回其母馮夫人問汝典郡有何異教堯咨曰每以弓矢為樂母曰汝父教汝

以忠孝輔國家今汝不務行仁化而專務一夫之勇豈汝父之志耶杖之碎其金魚

燕談

聽客與語

張密學奎弟密省亢母宋氏白之族也親教督二子讀書客至輒於窓間聽之客與其子論文學政事則為之設殽饌或閒話諧謔則不設也後二子皆登第奎少嗜酒嘗有酒失母怒欲笞之遂不飲終身

古今文集

雜著

弟子職

先生施教弟子是則溫恭自虛所受是極見善從之聞義則服溫柔孝弟毋驕恃力志毋虛邪行必正直游居有常必就有德顏色整齊中心必式夙興夜寐衣帶必飭朝繹暮習小心翼翼一此不懈是謂學則

教子

顏之推

上智不教而成下愚雖教無益中庸之人不教不知也

古者聖王有胎教之法懷子三月出居別宮目不邪視
耳不妄聽音聲滋味以禮節之書之玉版藏之金匱子
生孩提師保固明仁孝禮義導習之矣凡庶縱不能爾
當及嬰孩識人顏色知人喜怒便加教誨使為則為使
止則止比及數歲可省笞罰父母威嚴而有慈則子女
畏慎而孝矣吾見世間無教而有愛每不能然飲食運
為恣其所欲宜誠翻獎應訶反笑至有識知謂法當爾
驕慢已習方復制之捶撻至死而無威忿怒日隆而增

怨逮於成長終為敗德孔子云少成若天性習慣如自然
是也俗諺曰教婦初來教兒嬰孩誠哉斯語

古詩

責子

陶潛

白髮披兩鬢肌膚不復實雖有五男兒總不好紙筆阿
舒已二八懶惰故無匹阿宣行志學而不愛文術雍端
年十三不識六與七通子垂九齡但覓梨與栗天運苟
如此且進杯中物

黃山谷云觀淵明此詩想見其人慈祥戲謔可觀也俗人便謂淵明諸子皆不肖而淵明愁嘆見於詩耳又杜子美詩陶潛避俗翁未必能達道觀其著詩篇頗亦恨枯槁達生豈是足默識蓋不早生子賢與愚何其掛懷抱夫子美困頓於山川蓋為不知者詬病以為拙於生事又往往譏議宗文宗武失學故聊解嘲耳其詩名曰遣興可解也俗人便謂譏病淵明所謂痴人前不得說夢也

贈張籍

韓愈

吾老嗜讀書餘事不掛眼有兒雖甚憐教示不免簡君
來好呼出踉蹌越門限懼其無所知見則先愧赧昨因
有緣事上馬插手版留君住廳食使立侍盤盞薄暮歸
見君迎我笑而莞指渠相賀言此是萬金產吾愛其風
骨粹美無可揀試將詩義授如以肉貫弗開祛露毫末
自得高巖嵒我身蹈丘軻爵位不早綰固宜長有人文
章紹編刻感荷君子德恍若乘朽棧吾今吐所記解摘

了瑟間顧視窓壁間親戚競覘喜氣排寒冬逼耳鳴
睨睨如今更誰恨便可耕灞澹

符讀書城南

韓愈

木之就規矩在梓匠輪輿人之能為人由腹有詩書詩
書勤乃有不勤腹空虛欲知學之力賢愚同一初由其
不能學所入遂異閭兩家各生子提孩巧相如少長聚
嬉戲不殊同隊魚年至十二三頭角稍相疎二十漸乖
張清溝映汚渠三十骨骼成乃一龍一猪飛黃騰踏去

不能顧蟾蜍一為馬前卒鞭背生蟲蛆一為公與相潭
潭府中居問之何因爾學與不學歟金壁雖重寶費用
難貯儲學問藏之身身在則有餘君子與小人不係父
母且不見公與相起身自犁鋤不見三公後寒饑出無
驢文章豈不貴經訓乃菑畲潢潦無根源朝滿夕已除
人不通古今馬牛而襟裾行身陷不義況望多名譽時
秋積雨霽新涼入郊墟燈火稍可親簡編可卷舒豈不
旦夕念為爾惜居諸思義有相奪作詩勸躊躇

王得臣塵史云王荊公集唐李杜韓吏部洎歐陽
文忠公歌詩謂之四選集王莘樂道謂予曰集不
取韓公符讀書城南一篇何也予曰是篇大概教
子以取富貴宜荊公之不取也且有子賢與愚何
其掛懷抱淵明猶不免子美之譏況示以取富貴
哉樂道以為然

寄男抱孫

盧仝

別來三得書書道違離久書處甚粗殺且喜見汝手殷

十七又報汝文頗新有別來纔經年囊盎未合斗當是
汝母賢日夕加訓誘尚書當畢功禮記速須剖嘯囉兒
讀書何異摧枯朽尋義低作聲便可養年壽莫學村學
生麤氣強叫吼下學偷工夫新宅鋤菰莠乘涼勸奴婢
園裏耨葱韭遠籬編榆棘近眼栽桃柳引水灌竹中蒲
池種蓮藕撈漉蛙蝌脚莫遣生蝌斗竹林吾最惜新筍
好看守萬籜苞龍兒攢迸溢林藪吾眼恨不見心腸痛
如搗宅錢都未還債利日日厚籜龍正稱冤莫殺入汝

口丁寧囑託汝汝活籜龍否殷十七老儒是汝父師友
傳讀有疑誤輒告咨問取兩手莫破拳一吻莫飲酒莫
學捕鳩鴿莫學打雞狗小時無大傷習性防已後頑癢
苦惱人汝母必不受任汝惱弟妹任汝惱姨舅姨舅非
吾親弟妹多老醜莫惱添丁郎
添丁詩見
愛子門淚子作面垢
莫引添丁郎赫赤日裏走添丁郎小小別吾來久久脯
脯不得喫兄兄莫撚搜他日吾歸來家人若彈糾一百
放一下打汝九十九

律詩

遣興

杜甫

驥子好男兒前年學語時問人知客姓誦得老夫詩

示宗武

名驥

杜甫

覓句新知律攤書解滿床試啗青玉案莫帶紫羅囊假
日從時飲明年共我長應須飽經術已似愛文章十五
男兒志三千弟子行曾參與游夏達者得升堂

聞龜兒詠詩

白居易

憐渠已解弄詩章
搖膝支頤學二郎
莫學二郎吟太苦
纔年四十鬢如霜

愛子

知子
味於知子並附

羣書要語撫我育我
顧我復我出入腹我
夢思斯勤斯

鷺子之閔斯
鷺愛其子擇師而教之

韓師
說

詩句驕兒不離膝
畏我却復去
杜得書報平安
肥字如

棲鴉

黃

知子知子莫若父

昭十
三

昧於知子人莫知其子之惡

大學

古今事實

愛共叔段

鄭莊公寤生驚姜氏遂惡之愛共叔段欲立之請京使居之謂之京城大叔大叔完聚繕甲兵具卒乘將襲鄭

三隱

教以義方

見教子門

人愛少子

左師觸讐見太后曰老臣賤息舒祺最少臣竊憐之願
補黑衣之闕太后曰丈夫亦愛少子乎對曰甚於婦人

策戰國

老牛舐犢

見喪
子門

抱置膝上

王坦之字文廣父述愛之雖長大猶抱置膝上

不與講論

林道人詣謝東陽時始總角新病起與林公講論遂至

相苦王夫人自壁後出云新婦一生所寄惟在此兒流涕抱兒以歸謝公曰家嫂詞情慷慨致可傳述恨不使

朝士見

世說

寵愛失教

梁元帝時有一學士聰敏有才為父所寵失於教義一言之是偏於行路終年譽之一行之非淹歲文飾冀其自改年登婚冠暴慢日滋竟以言語不擇為周逖抽腸

釁鼓云

顏氏家訓

譽兒癖

王福時五子勔勗助勸皆以文顯嘗詫於韓彥思彥思戲之曰武子有馬癖君有譽兒癖王家癖何多耶

知子可舉

以下像知子

祁奚請老晉侯問嗣曰午也可

知子必敗

趙括少學兵法父奢不能詰然不謂善曰兵死地而括易言之趙王以括為將代廉頗藺相如曰括徒能讀其

父書傳不知合變及括將行母上書願王勿遣即有不稱妾得無隨坐可乎

視子知貧

見誕子門

知子奢儉

范蠡至陶致貲鉅萬自謂陶朱公中子殺人囚於楚朱公曰吾聞千金之子不死於市告其少子曰往視之長男曰家有長子曰家督乃遣少弟是吾不肖也欲自殺朱公不得已遣長子至則楚王怒論殺朱公子明日下

勅長男竟持其弟喪歸朱公笑曰吾固知其必殺弟汝
見吾貧苦時重惜金所以卒殺汝弟如少弟生而見我
富乘堅驅良豈知財之從來吾欲遣少弟為能棄財也

史記

知子賢愚

張安世長子千秋與霍光子禹俱隨范明友擊烏桓還
謁大將軍光問千秋戰鬪方略千秋口對兵事畫地成
圖無所遺失問禹禹不能記光由是賢千秋以禹為不

材

知子不能

薛宣子惠亦官二千石始為彭城令宣過其縣心知惠不能案行舍中處置什物終不問以吏事

知子必富

石崇司徒苞之幼子生於青州故小名齊奴少敏慧有謀苞臨終分財物與諸子獨不及崇其母以為言苞曰此兒雖小後能自得及為荊州刺史劫遠使商客致富

不貴

知子能書

見字
學門

知子所得

晉穆帝問顏延之曰竣得臣筆測得臣文奐得臣義曜
得臣酒

知子必貴

唐王珪少與房杜善珪母李曰而必貴然未知所與遊
者何如人試與偕來會玄齡等過其家母大驚勅具酒

食曰二客公輔才汝貴不疑按杜甫送王砮詩則珪母杜氏非李氏也

不知子能文

以下係昧於知子

陳思王植太祖嘗視其文曰汝倩人耳植跪曰固當面試柰何倩人時建鄴銅雀臺新成太祖將諸子登臺使各賦植援筆立成太祖甚異之

不為父所知

山簡濤之子也簡歎曰吾年幾三十而不為家公所知

遇以常兒

謝惠連初有奇才不為父方明所知族兄靈運謂方明曰阿連才悟如此而尊作常兒遇之

以豚犬畜

萬迴師神若痴愚雖父母亦以豚犬畜之兄戍役安西音問隔絕忽一日朝往夕返曰兄平善發書視之乃兄手迹其家以其萬里而迴故號萬迴

開元傳
信記

古今文集

雜著

愛子致禍

人之愛子亦罕能均自古及今此弊多矣賢俊者自可賞愛頑魯者亦當矜憐有偏寵者雖欲以厚之更所以禍之共叔之死母實為之趙王之戮父實為之劉表之傾宗覆族袁紹之地裂兵亡可為明鑒

顏氏家訓

古詩

示添丁

盧仝

春風苦不仁呼逐馬蹄行人家慚愧瘴氣却憐我入我
憔悴骨中為生涯數日不食強起行何忍索我抱香滿
樹花不知四體正困憊泥人啼哭聲呀呀忽來案上翻
墨汁塗抹詩書如老鴉父憐母惜摑不得却生痴笑令
人嗟宿春連曉不成米日高始進一碗茶氣力龍鍾頭
欲白憑仗添丁莫惱爺

唐人多傳盧仝因留宿王涯第中遂預甘露之禍
仝老無髮闔人於腦後加釘焉人以為添丁之讖

或言好事者為之全處士於人無怨何為有此謗
然平時切齒元和逆黨月蝕一詩膾炙人口意者
羣閹以此禍之

北征

杜甫

况我墮胡塵及歸盡華髮經年至茅屋妻子衣百結慟
哭松聲迴悲泉共幽咽平生所驕兒顏色白勝雪見爺
背面啼垢膩脚不韉牀前兩小女補綻纔過膝海圖折
波濤舊繡移曲折天吳及紫鳳顛倒在短褐老夫情懷

惡嘔泄卧數日那無囊中帛救汝寒凜慄粉黛亦解色
衾裯稍羅列瘦妻面復光癡女頭自櫛學母無不為曉
粧隨手抹移時施朱鉛狼籍畫眉濶生還對童穉似欲
忘饑渴問事競挽鬚誰能即嗔喝翻思在賊愁甘受雜
亂聒新歸且慰意生理焉得說

律詩

嘲小德

黃魯直

中年舉兒子謾種老生涯學語轉春鳥塗憲行暮鴉欲

嗔王母惜稍慧女兒誇解著潛夫論不妨無外家

有子 不肖子附

羣書要語子克家 蒙卦 幹父之蠱 裕父之蠱 並蠱卦 篤前

人成烈 洛誥 克紹前烈 罔命 維其有之是以似之 裳卦 國人稱

願然曰幸哉有子如此所謂孝也已 祭義 良治之子必學

為裘良弓之子必學為箕 樂記 稚子候門 陶 姆抱幼子立

側眉眼如畫髮漆黑肌肉玉雪可憐娟好靜秀瑤環瑜

珥蘭茁其芽稱其家兒 韓愈撰馬公墓誌

詩句昔別君未婚兒女忽成行

杜

弱妻抱幼子出拜忘

慙羞

韓

有客過茅宇呼兒正葛巾

杜

是時應門兒紫蘭

茁其芽

山谷

羲之生五之

坡

兒女嬉笑牽人衣

李

牽衣兒

女遶太白扇枕郎君煩阿香

坡

大兒踉蹌越門限小兒

呶啞語繡帳

坡

如今莫問老與少兒子森森如立竹

坡

不肖子若考作室既底法厥子乃弗肯堂矧肯構厥父

菑厥子乃弗肯播矧肯穫其肯曰予有後弗棄基

大誥

其

父析薪其子弗克負荷

左

厥子乃不知稼穡之艱難

無逸

弗念厥紹

柳

行莫醜於辱先

司馬遷

古今事實

才子八人

昔高陽氏有才子八人謂之八愷高辛氏有才子八人謂之八元此十六族也世濟其美

五世傳一子

揚雄傳自季至雄五世而傳一子故雄無它揚於蜀

各守一藝

鄧禹子十三人各使守一藝教養子孫為後世法

必興吾門

陳羣為兒時祖寔謂宗人曰此兒必興吾門

當如仲謀

曹公攻濡須塢孫權拒之乘輕船入曹公軍還作鼓吹

公見整肅嘆曰生子當如孫仲謀劉景升兒子豚犬耳

吳志梁帝曰生子當如李亞子克用為不亡矣吾兒豚犬

耳

五代

荀氏八龍

荀淑有子八人謂之八龍

一不為少

梁陸瓊幼聰慧從祖襄嘆曰此兒必荷門基所謂一不為少 褚淵嘗謂任昉父遙曰聞卿有令子相為喜之所謂百不為多一不為少

頭角斬然

柳宗元少精敏逮其父時雖年少已自成人能取進士

第斬然見頭角衆謂柳氏有子矣

墓誌

令子

鄭餘慶子涵為右補闕敢言無忌諱憲宗謂餘慶曰涵卿令子而朕直臣也可更相賀

聳壑昂霄

高孝基見房玄齡曰僕閱人多矣未有如此郎者當為國器但恨不見其聳壑昂霄耳

西平有子

見父
子門

竇氏五龍

見及第門

韓氏八龍

韓忠憲八子時以比荀氏八龍

詳見教子門

不才子

以下係不肖子

帝鴻氏有不才子掩義隱賊好行凶德醜類惡物頑嚚不友是與比同謂之渾敦少皞氏有不才子毀信廢忠崇飾惡言猜譖庸回服讒蒐慝以誣盛德謂之窮奇顓帝氏有不才子不可訓教不知話言告之則頑舍之則

嚚傲很明德以亂天常謂之禱杌此三族也世濟其凶
縉雲氏有不才子貪於飲食冒於貨賄侵欲崇侈不可
盈厭聚斂積實不知紀極不分孤陋不恤窮匱天下之
民以比三凶謂之饕餮舜臣堯賓於四門流四凶族投
之四裔以禦魑魅

左文

朱均不肖

堯之子不肖

丹朱

舜之子亦不肖

商均

不辨菽麥

程滑弑厲公荀瑩士魴逆周子于京師而立之周子有兄而無慧不能辨菽麥故不可立注豆麥殊形易別故以為癡者之候不慧蓋世所謂癡左桓溫第四子裒不辨菽麥

怒其不敬

丙吉子顯少為諸曹嘗從祀高廟至夕牲乃使出取齋衣丞相吉大怒謂其夫人曰宗廟至重而顯不敬謹亡吾爵者必顯也甘露中有罪削爵為關內侯

不如友子

後漢太原王霸妻不知誰氏霸立高節與同郡令狐子伯為友子伯為楚相而其子為郡功曹子伯令子奉書於霸車馬服從雍容如也霸子方耕於野聞客至投耒而歸見令狐子沮怍不能仰視霸目之有愧色客去卧不起妻恠問故霸曰吾與子伯素不相若向見其子容貌甚光舉措有適我兒曹蓬髮歷齒未知禮則父子恩深不覺自失耳妻曰君少脩清節不顧榮祿今子伯之

貴孰與君之高柰何忘初志而慙兒子乎霸崛起而笑
曰有是哉遂共隱終其身

若豚犬耳

見有子門

不識金鉞

梁廬陵王續之子應不慧王薨至庫內閱珍物見金鉞
問左右曰此可食否荅曰不可應曰既不可食並總乞
汝

不肖敗家

覆試曳白

並見閭閻子弟門

不隱子過

姚崇二子在洛通賓客饋遺憑舊請托魏知古歸悉以聞他日帝召崇曰卿子才乎皆安在崇揣知帝意曰臣二子分司東都其為人多欲而寡謹是必嘗以事干魏知古帝始以崇私其子及聞大喜問安從得之對曰知古臣所薦也臣子謂必見德而請之帝於是愛崇不私而薄知古

子不識字

韓昶退之子也性闇劣為集賢校理史傳有金根車昶

以為誤悉改根字作銀字

尚書
故實

一賢一否

中宗嘗召宰相蘇瓌李嶠子進見瓌子頤曰木從繩則
正后從諫則聖嶠子迹曰斲朝涉之脰剖賢人之心上
曰蘇瓌有子李嶠無兒

子為人患

狄仁傑為魏州刺史有惠政百姓為之立生祠後其子景暉為魏州司功參軍貪暴人患焉遂毀其像

古今文集

古詩

徐卿二子歌

見幼
悟門

過於海舶得邁寄書酒作詩遠和之皆粲然
可觀子由有書相慶因用其韻賦一篇并

寄諸子姪

蘇子瞻

我似老牛鞭不動雨滑泥深四蹠重汝如黃犢走却來
海濶山高百程送庶幾門戶有八慈不恨居隣無二仲
他年汝曹笏滿床中夜起舞踏破甕會當洗眼看騰躍
莫指癡腹笑空洞譽兒雖是兩翁癖積德已自三世種
豈惟萬一許生還尚恐九十煩珍從六子晨耕簞瓢出
衆婦夜績燈火共春秋古史乃家法詩筆離騷亦時用
但令文字還照世糞土腐餘何足夢

贈山谷子


蘇子瞻

黃童三尺世無雙
筆頭滾滾懸秋江
不憂老子難為父
平生崛強今心降
我來喜共阿戎語
應敵縱橫如急雨
生子還如孫仲謀
豚犬謾多何足數
黃家小兒名拾得
眉如長松眼如漆
只今數歲已動人
老人留眼看他日
笑君老蚌生明珠
自笑此物吾家無
君當置酒吾當賀
有兒傳業更何須

詩話

不肖子三變

不肖子弟有三變第一變為蝗蟲謂鬻莊而食第二變為蠹魚謂鬻書而食第三變為大蟲謂賣婢子而食三食之輩何代無之



古今事文類聚後集卷六

欽定四庫全書

子部

古今事文類聚後集卷八

詳校官中書_臣康綸鈞

侍讀_臣孫球覆勘

總校官編修_臣王燕緒

校對官中書_臣趙秉淵

謄錄監生_臣王鈞

欽定四庫全書

古今事文類聚後集卷七

宋 祝穆 撰

人倫部

無子

喪子
立嗣並附

羣書要語不孝有三無後為大

妻離

老而無子曰獨

梁惠

內

無應門五尺之童

李密表

詩句中郎有女能傳業伯道無兒可保家

韓

喪子汝目汝面在吾眼旁

韓祭女
拏丈

詩句傷心自嘆鳩巢拙長墮春雛養不成

白

愁淚隨心

送

白

立嗣螟蛉之子殪而逢螺贏祝之曰類我類我久則肖

之矣

揚子

古今事實

無子無憂

商瞿年老無子其母為取室孔子曰無憂瞿年四十後

當有五丈夫已而果然

老而無子

楚靈王聞羣公子之死自投於車下曰人之愛其子亦如予乎侍者曰甚焉小人老而無子知擠於溝壑矣

子自晚生

梁鱣年三十未有子欲出其妻商瞿曰吾恐子自晚生耳未必妻之過鱣從之一年而有子

並家語

不可無後

王思子文之治楚國也曰子文無後何以勸善使復其

所改命曰生

宣

成季之勲宣孟之忠而無後為善者懼

矣

成

八不可使恭叔無後於鄭

莊十六

若敖氏鬼

見誕子門

多女無男

齊太倉令淳于公無子有女五人有罪當刑罵曰生女不生男緩急非所益其幼女緹縈自傷泣上書願沒入為官婢以贖父罪書奏文帝憐之除肉刑

無子改娶

陵穆子娶妻五年無子父母欲其改娶其妻聞之中夜

悲嘯陵穆子感傷而作別鶴操

韓文

無子依人

樓護字君卿故人呂公無子而歸護護養之終其身

伯道無兒

鄧攸字伯道後石勒過泗水攸以牛馬負妻子而逃遇賊掠其牛馬步走擔其兒及弟子綏度不能兩全乃謂

其妻曰吾弟早亡惟有一息理不可絕止當自絕我兒耳幸而得存我後當有子妻泣而從之乃棄之其子朝棄而暮及明日攸繫之於樹而去後妻不復孕過江納妾甚寵之訊其家屬說是遭亂憶父母姓名乃攸之甥攸素有德行聞之感恨遂不復畜妾卒以無嗣時人哀之為之語曰天道無知使鄧伯道無兒

贊曰攸棄子存姪以義斷恩若力所不能自可割情忍痛何至預加徽纆絕其奔走者乎斯豈慈父

仁人之用心也卒以絕嗣宜哉勿謂天道無知乃
有知矣

喪子喪明

以下係
喪子

子夏喪其子而喪其明曾子弔而怒之曰喪爾子而喪
其明爾罪三也子夏投其杖而拜之曰吾過矣

子死不憂

魏人有東門吳者年四十有二子喪之而不憂其相室
曰公之愛子也天下無有今子死而不憂何也吳曰吾

當無子之時不憂今子死乃與向日無子同吾何憂焉

子列

老牛舐犢

後漢楊彪位至太尉彪見漢祚將終稱脚摩不復行積
十年後子脩為曹操所殺操見彪問曰公何瘦之甚荅
曰悔無日殫先見之明猶懷老牛舐犢之愛操為改容
鍾情幼子

王衍嘗喪幼子山簡弔之衍悲不自勝簡曰孩抱中物

何至於此衍曰聖人忘情最下不及情然則情之所鍾正在我輩簡服其言更為之慟

恨其死晚

郗超字嘉賓將亡出其所與桓溫密謀之書一篋囑其門生曰若家君眠食太減即出此書方回見之曰是子死已晚矣乃不復念

天下痛心

王愆期謂陶侃曰賢子越騎酷沒天下為公痛心况慈

父乎

世說

不忍開篋

王導還臺其子悅未嘗不送又為襃歛箱篋中物悅亡導還臺至常送處哭之至臺其母封篋不忍開之

神奪其子

王導子悅為中書郎先導卒導先夢人以百萬錢買悅潛為祈禱者脩矣尋掘地得錢百萬意甚惡之一一皆藏閉及悅疾篤導憂念特至不食積日忽見一人形狀

甚偉被甲持刀導問是何人曰僕蔣侯也公兒不佳欲
為請命故來耳導因與之食食至數斗食畢謂導曰中
書命盡非可救也言訖不見悅隨殞絕

心疑計至

豫章太守顧邵雍之子也在郡卒雍時盛集賓客自與
客棊而讀至無兒書雖神色不變而心了其故以爪掐
掌流血沾襟客散方歎已無延陵之高豈有喪明之痛

瘞於路側

潘岳西征賦曰天赤子於新安坎路側而瘞之注岳子
以三月生五月天六十餘日也

以姪孫為後

係立嗣

白樂天無子以姪孫阿新為之後

古今文集

律詩

白蘇州寄詩有歎早白無兒之句因以贈之

劉禹錫

莫嗟華髮與無兒却是人間久遠期雪裏高山頭白早
海中仙果子生遲于公必有高門慶謝守何煩曉鏡悲
幸免如新分非淺祝君長詠夢熊詩

古詩

以下係
喪子

東野連產三子不數日輒失之幾老念無後
以悲友人韓愈推天假其命以喻之

鷓鴣啄母腦母死子始蕃蝮蛇生子時圻裂腸與肝好
子雖云好未還恩與勤惡子不可說鷓鴣蝮蛇然有子

且勿喜無子固勿歎

律詩

喪子崔兒

白居易

書報微之晦叔知欲題崔字淚先垂文章十帙官三品
身後傳誰庇蔭誰

哭邢惇夫

黃魯直

詩到隨州更老成江山為助筆縱橫眼看白壁埋黃壤
何況人間父子情

吟白君哭崔兒詩悽然寄題

劉禹錫

吟君苦調我霑纓能使無情盡有情
四望車中心未釋
千秋亭下賦初成
庭梧已有雛棲處
池鶴今無子和聲
從此期君比瓊樹
一枝吹折一枝生

亡女生日感懷

戴叔倫

五逢晬日今方見
置爾懷中自惘然
乍喜老身辭遠役
翻悲一笑隔重泉
欲教針線嬌難解
暫弄琴書性已便

還有蔡家殘史籍可能分付外人傳

詩話

瘞女作詩

韓昌黎貶潮州時小女道死瘞之層峰驛之下題詩驛

梁云數條藤束木皮棺草殮荒山白骨寒

祖孫諸孫附

羣書要語鼻祖

見宗族注

無忝爾祖

繩其祖武

武下

續戎祖

考

民

子之子為孫孫之子為曾孫曾孫之子為玄孫玄

孫之子為來孫來孫之子為弟孫弟孫之子為仍孫仍

孫之子為雲孫

注

輕遠如浮雲也

爾雅仍漢書作耳

應劭曰耳

孫者玄孫之子也言其去高曾益遠但耳聞之也

惠紀注

詩句却超叛鑒似無孫

坡

古今事實

祖孫並相

伊尹相湯伊陟相大戊

召公是似

召康公奭十六世孫召穆公虎佐宣王平淮夷故江漢之詩曰文武受命召公維翰無曰予小子召公是似

孔孫中庸

孔子之孫子思作中庸

祖孫移山

北山愚公年且九十面山而居懲北山之寒出入之迂也遂率子孫荷擔扣石墾壤箕畚運於北海之尾河曲智叟笑而止之愚公長息曰我之死有子在焉子又生

孫孫又生子子又生孫子子孫孫無窮匱也而山不加增何苦不平于是河曲智叟無以應之

列子

三世惡始彰

左氏傳秦伯問士鞅曰晉大夫誰先亡對曰其欒氏乎
廩汰虐已甚猶可以免其身禍在盈也欒廩死盈之善
未能以及人武子之施沒矣而廩之惡實彰將于是乎
在後晉果滅欒氏應劭曰晉大夫欒書書子廩廩子盈
書賢而覆廩廩惡而害盈曹大家曰天命佑善災惡非

有差也然其道廣大雖父子百葉猶若一體也

在其子孫

陳厲公生敬仲其少也周史有以周易見陳侯者陳侯使筮之曰此遇觀之否曰是觀國之光利用賓於王其代陳有國乎不在此其在異國不在其身在其子孫光遠而自他有耀者也其後陳桓子成得政於齊

左

不食示訓

石奮歸老於家子孫為小吏來歸謁必朝服見之不名

子孫有過失不誚讓為便坐對案不食諸子相責肉袒謝罪迺許子孫勝冠者在側雖燕必冠申申如也

皆以學顯

董仲舒子及孫皆以學成至顯官

封蕭何孫

漢武帝元狩元年封故鄼侯曾孫為鄼侯

賈誼有孫

賈誼之孫賈嘉

不以產業

疏廣事見
宗族門

有祖風

李廣有孫陵為侍中善騎射愛人下士帝以為有廣之風後降虜隴西之士以為深耻

遺以清白

楊震性廉子孫嘗蔬食步行或勸之開產業震曰使後世稱為清白吏子孫以此遺之不亦厚乎 靈帝謂楊震孫竒曰卿強項真楊震子孫

遺之以安

龐公未嘗入城府夫妻相敬如賓劉表候之龐公釋耕隴上而妻子耘於前表指而問曰先生苦居畝畝而不肯官祿後世何以遺子孫龐公曰世人皆遺之以危今獨遺之以安雖所遺不同未嘗無所遺也表嘆息而去

嗣守為難

陳寔字仲弓子紀字元方諱字季方父子並著高名至孫羣仕魏領丞相荀淑字季和荀卿十一世孫有八

人時謂八龍而慈明無雙至孫或從魏太祖太祖曰吾之子房

朱文公贊云羣既附曹或亦忘漢室嗣守之難今

古共嘆

分甘子孫

王羲之牽諸子抱弱孫一味之甘割而分之以娛目前

立有靈運

謝靈運祖立晉車騎將軍父暕生而不慧早亡靈運幼

穎敏立甚異之謂親知曰我乃生晚晚兒何不及我晚
乃生靈運靈運幸過晚

祖奇此兒

衛玠年五歲風神秀異祖父瓘曰此兒有異於衆顧吾
年老不見其長成耳

陶公遠祖

陶潛侃之孫

詳見祖
父門

祖以硯與

見年
齒門

因石思祖

薛元超轉中書舍人省中有盤石祖道衡為侍郎時嘗據以草制元超每見之輒泣然流涕

子有佳兒

許敬宗孫彥伯昂子也頗有文敬宗晚年不復下筆凡大典冊悉彥伯為之嘗戲昂曰吾兒不及若兒對曰渠父不如昂父

世說

張蒼梧張憑之祖也嘗語其父曰我不

如汝憑父未解所以蒼梧曰汝有佳兒憑時年數歲歛

手曰阿翁詎宜以子戲父

發明祖書

姚珽始曾祖蔡嘗著漢書訓纂而後之著漢書者多竊取其義為己說珽著紹訓以發明舊義

不辨羣孫

後周李遷哲嘗除真州刺史即本州也遷哲妾媵百數男女六十九人緣漢十餘里第宅相次姬媵之有子者分處其中遷哲鳴笳導從往來其間縱酒歡燕子孫叅

見或忘其年名披簿以審之汾陽郭子儀諸孫數十人每問安不盡辨領之而已

喜有曾孫

周蕭愿梁宰相頌之子曾祖儼唐僖宗朝入相接客之次愿為兒童戲効傳呼之聲儼語諸客曰余不敢以得位為喜所幸者壽考今又有曾孫在吾目前

祖孫宰相

李栖筠之子吉甫其孫德裕

祖孫名將

馬璘讀馬援傳至丈夫當死邊野慨然曰使吾祖勲墜
地下乎卒為中興名將

祖笏猶存

唐文宗以右拾遺魏謩徵之裔孫頗奇之謩累諫轉起
居舍人紫宸中謝上曰卿家有舊書詔否對曰比多失
墜惟簪笏存上曰進來鄭覃曰在人不在笏上曰覃不
解朕意此甘棠之義非笏而已宣宗嘗曰謩名臣孫有

祖風朕心憚之 贊曰暮之議論挺挺有祖風烈

見其三世

韓愈撰殿中少監馬君墓誌曰始余初冠應進士貢在

京師窮不能自存以故人稚弟拜北平王燧於馬前王

問而憐之因得見於安邑里第王軫其饑寒賜食與衣

召二子使為之主當是時見王於北亭猶高山深林龍

虎變化不測傑魁人也退見少傅即其子暢翠竹碧梧鸞鵠

停峙能守其業者也姆抱幼子立側眉眼如畫髮漆黑

肌肉玉雪可憐娟好靜秀瑤環瑜珥蘭茁其芽稱其家

兒

即殿中少監馬君繼祖也

嗚呼吾未耄自始至今未四十年而哭

其祖子孫三世於人世何如也

古今文集

雜著

誠子孫訓

柳玘

夫門地高者一事墜先訓則異它人雖生可以苟爵位
死不可見祖先地下門高則自驕族盛則人窺嫉實藝

懿行人未必信纖瑕微累十手爭指修已不得不至為
學不得不堅士君子生於世已無能而望他人用已無
善而望他人愛猶農夫鹵莽種之而怨天澤不潤雖欲
弗餒可乎余幼聞先公僕射言立已以孝弟為基恭默
為本畏怯為務勤儉為法肥家以忍順保交以簡恭廣
記如不及求名如儻來蒞官則廉已省事而後可以言
家法家法脩然後可以言養人直不近禍廉不沽名憂
與禍不偕潔與富不並董生有云弔者在門賀者在閭

言憂則恐懼恐懼則福至又曰賀者在門弔者在閭言受福則驕奢驕奢則禍至故世族遠長與命位豐約不假問龜蓍星數在處心行事而已先君兄弟三人俱居清列非速客不二羹馘食甃葡萄而已皆保重名於世名門右族莫不由祖考忠孝勤儉以成立之莫不由子孫頑率奢傲以覆墜之成立之難如升天覆墜之易如燎毛余家本以學識禮法稱於士林夫行道之人德行文學為根株正直剛毅為柯葉有根無葉或可俟時有

葉無根膏雨所不能活也至於孝慈友悌忠信篤行乃食之醢醬可一日無哉

戒子孫

邵堯夫

上品之人不教而善中品之人教而後善下品之人教亦不善不教而善非聖而何教而後善非賢而何教亦不善非愚而何是知善也者吉之謂也不善也者凶之謂也吉也者目不觀非禮之色耳不聽非禮之聲口不道非禮之言足不踐非禮之地人非善不交物非義不

取親賢如就芝蘭避惡如畏蛇蝎或曰不謂之吉人則
吾不信也凶也者語言詭譎動止陰險好利飾非貪淫
樂禍疾良善如讐隙犯刑憲如飲食小則殞身滅性大
則覆宗絕祀或曰不謂之凶人則吾不信也傳有之曰
吉人為善惟日不足凶人為不善亦惟日不足汝等欲
為吉人乎欲為凶人乎

家訓

蘇子瞻

漢邴曼容戒子孫仕不過六百石郎官謁者不為顯吾

尚以為過汝等但能守家法傳家學貧不免仕官則循資格於吏部注擬差遣雖筦庫亦可以無愧矣

諸父

姪附

羣書要語既有肥羜以速諸父

疏

伯父叔父

伐本

父之昆

弟先生為世父後生為叔父

爾雅

父之從父昆弟為從祖

父

同上

伯把也把持家政也父弟為仲仲中也位在中也

仲父之弟曰叔父叔少也叔父之弟曰季季癸也甲乙

之次癸在下也

釋名

姪兄弟之子猶子也蓋引而進之檀弓姪對姑而言今人

於伯叔父前皆以為猶子蓋記禮者主喪服言如夫子

謂回也視予猶父若以姪謂之猶子則亦當以先生為

猶父矣漢人謂之從子却得其正蓋伯叔皆從父也朱語

錄

詩句令嗣才俊茂

杜送韋評事

嗣宗諸子姪早覺仲容賢杜

旋看蠟鳳戲僧虔

東坡寄三猶子

君家自與竹林齊

坡和劉原父

古今事實

說以日飲

爰盎為吳相兄子種說以日飲無何

叔姪掛冠

見致仕門

已子兄子

後漢第五倫字伯魚或問倫有私乎曰余兄子嘗病一夜十起退而安寢余子有病雖不省視而通宵不寐若是可謂無私乎

伯姪分財

薛苞弟子求出苞不敢止乃中分其財奴婢引其老病者曰與我共事久若不能使也田廬取其荒頓者曰吾少時所治意所戀也器物取其朽敗者曰我服食久身口所安也

失愛叔父

曹操小字阿瞞少無度叔父數言之於嵩

操之父

操患之

逢叔父於路乃陽敗面啗口叔父以告嵩嵩呼操曰叔父言汝中風已差乎操曰初不中風但失愛叔父故見

罔耳後叔父有所告嵩不復信操始肆意

叔姪並遊

阮咸字仲容任達不拘與叔籍為竹林之遊南阮富北

阮貧

詳見宗族門

攜子姪遊

謝安字安石於東山營墅樓館林木甚盛每携中外子姪往來遊集肴饌亦屢費百金世頗以此譏焉而安殊不以屑意

庭階芝蘭

謝玄與從兄朗為叔父安所器因戒約子姪曰子弟亦何豫人事而正欲使其佳玄曰如芝蘭玉樹欲使生於庭階耳

舉姪督軍

謝安兄子玄有經國才略時苻堅數侵寇安乃舉玄為前鋒戰于淝水苻堅餘衆棄甲宵遁聞風聲鶴唳以為王師至

叔焚香囊

謝玄少時好佩紫羅香囊叔父安患之而不欲傷其意因戲賭而焚之於是遂止

杖姪設饌

見飲燕門

棄子全姪

魏張範子陵及弟子戢為山賊所得範直詣賊請二子賊以陵還範範謝曰諸君相還兒厚矣夫人情雖愛其子然吾憐戢之小請以陵易之賊義其志悉以還範

此與

伯道無兒類

詳見無子門

阿大中郎

見婚姻門

姪千里駒

符朗堅從兄子也堅嘗目之曰吾家千里駒

鞠愛其姪

桓宣武溫薨桓南郡立冲之姪十五歲始除桓車騎與
送故文武別冲因指語南郡此皆汝家故吏佐立應聲
慟哭酸感桓車騎每自目已坐曰靈寶

立小字

成人當以

此坐還鞠愛過於所生

撫育孤姪

謝幾卿家門篤睦兄才卿卒子早孤幼幾卿撫育甚厚及長皆幾卿獎訓之力

伯父稱美

王曇首與兄弟會集諸子孫任其戲適僧虔採蠟珠為鳳凰伯父獨稱其美

臣叔不疑

王湛初有隱德人莫能知兄弟宗族皆以為癡兄子濟
輕之嘗詣湛見牀頭有周易濟請言之因剖析玄理微
妙有奇趣嘆曰家有名士三十年而不知濟去叔送出
門濟從騎有一馬難乘無能騎者請騎之回策如素濟
益嘆其難測既還渾問濟何以暫行累日曰始得一叔
渾問其故具嘆述如此渾曰何如我濟曰濟以上人武
帝每見濟輒以湛調之曰卿家癡叔死未對曰臣叔殊
不癡具稱其美

乞封叔父

魏王基封安樂鄉侯上疏求分封二百戶賜叔父子喬
爵關內侯以報叔父詔特聽之

請封兄子

唐魏徵以定五禮當封一子縣男徵請封孤兄子叔慈
帝愴然曰此可以勸俗即許之

伯父見奇

柳公綽始生之日伯父子華曰興吾門者此兒也因小

字起之

自乳兄子

元德秀兄子襁褓喪親無資得乳媪乃自乳之數日漣
流能食乃止

薦姪可用

呂文穆公蒙正致政居洛真宗祀汾陰過洛幸其宅問
曰卿諸子孰可用公對曰臣諸子皆豚犬不足用有姪
夷簡任潁州推官宰相才也帝記其言遂至大用蓋文

靖公也

聞見錄

奏兄子官

陳忠肅公權兄弟友愛伯氏畢世公撫恤其孤初奏郊恩捨己子而先伯父之子及後貶責以至終身諸子皆白衣未嘗有不滿之意

遺事

古今文集

雜著

誠兄子書

馬援

吾欲汝曹聞人過失如聞父母之名耳可得而聞口不
得言也好議論人長短妄是非政法此吾所大惡也寧
死不願子孫有此行也龍伯高敦厚周密口無擇言謙
約節儉廉公有威吾愛之重之願汝曹效之杜季良豪
俠好義憂人之憂樂人之樂清濁無所失父喪致客數
郡畢至吾愛之重之不願汝曹效之效伯高不得猶為
謹勅之士所謂刻鵠不成尚類鶩效季良不得陷為天
下輕薄子所謂畫虎不成反類狗者也

范文正公與姪帖

三郎官人昨得書知在官平善此中亦如常只是純祐未全安汝守居須小心不得欺事與同官和睦多禮有事只與同官議莫與小人商量莫縱鄉親來部下興販自家且一向清心做官莫營私利汝看老叔自來如何還曾營私否自家好家門各為好事以光祖宗頻寄書來言彼動靜將息將息不具叔報

右范文正公與其兄子之書也其言近而易知凡

今之仕者得其說而敬守之亦足以檢身而及物
矣然公所自謂未嘗營私者必若公之先天下之
憂而憂後天下之樂而樂然後為能充其名實而
其所論親僚友以銷壅蔽之萌明禁防以杜交私
之漸者引而伸之又非獨効一官之守者所宜知
也侯官大夫陳君煇得公此帖刻寘坐隅以自警
省其蓋三復焉而嘆其指之遠而不可窮也敢竊
識其說於左方庶幾覽者有以發焉年月日新安

朱某謹書

司馬文正公與姪帖

叔五月二十三日到京與八哥哥以下俱安八哥哥飲食起居甚健殊不似去年在鄉里時不用憂得光近蒙聖恩除門下侍郎此皆祖考餘慶家門厚福致茲忝竊誠為多幸然光素無才能加以衰老久在沈散絕望顯榮一朝陞擢出人意表舉朝之人悉非舊識逆見忌嫉者何可勝數而獨以愚直之性處於其間如一黃葉在

烈風中幾何其不危墜也是以受命以來有懼而無喜
汝輩當識此意倍須謙恭推讓伏弱於人不可恃賴我
聲勢作不公不法攪擾官方侵凌小民使為鄉人所厭
苦則我之禍皆起於汝輩如曹侍中兒帶累曹侍中貶
隨州自縊死也且當共相愛惜我身若危則汝輩亦不
如人也我待牒縣令榜街市豫先約束汝輩所以曲相
保全使不陷於刑法且莫恠也時熱且各好自將息叔
報五通直以下六月三日

易之家人以勿恤為相愛老子謂慈故能勇司馬
文正所以訓約其家者峻厲嚴密凜乎其不可犯
此慈愛之至也 玉山汪應辰書

古詩

冬至日示小姪阿宜

杜牧

小姪名阿宜未得三尺長頭圓筋骨緊兩臉明且光去
年學官人竹馬遶四廊指揮羣兒輩意氣何堅剛今年
始讀書下口三五行隨兄旦夕去斂手整衣裳去歲冬

至日拜我立我旁祝爾願爾貴仍且壽命長今年我江
外今日生一陽憶爾不可見祝爾傾一觴陽德比君子
初生甚微芒排陰出九地萬物隨開張一似小兒學日
就復月將勤勤不自己二十能文章仕官至卿相致君
作堯湯我家公相家劒佩常丁當舊第開朱門長安城
中央第中無別物萬卷書滿堂家集二百編上下馳皇
王多是撫州寫今來五紀強尚可與汝讀助爾為賢良
經書刮根本史書閱興亡高摘屈宋艷濃薰班馬香李

杜泛浩浩韓柳摩蒼蒼近者四君子與古爭強梁願汝
一祝後讀書日日忙一日讀十紙一月讀一箱朝廷用
文治大開官職場願爾出門去取官如驅羊吾兄苦好
古學問不可量書居府中第夜歸書滿床後貴有金玉
必不為爾藏崔昭生崔芸李兼生窟郎堆錢一百屋破
散何披猖今雖未即死餓凍幾欲僵叅軍與縣尉塵土
驚助勦一語不中治筭箠身滿瘡官罷得絲髮好買百
樹桑稅錢未輸足得米不敢嘗願爾聞我語懽喜入心

腸大明帝宮闕杜曲我池塘我若自潦倒看爾爭翱翔
總語諸小道此詩不可忘

此篇視符讀書城南之作尤淺陋矣姑錄之以為
世戒

蘇子由已卯生坡號為卯君生子名虎兒坡
詩云

舊聞老蚌生明珠未省老兔生於菟老兔自謂月中物
不騎快馬騎蟾蜍蟾蜍爬沙不肯行坐令青衫且白鬚於菟

莫去沙邊學釣魚
莫將百丈作轆轤
清江濯足江下坐
燕子日長宜讀書

詩話

退之姪

退之詩云阿買不識字頗知書
八分詩成使之寫亦足
張吾軍或問山谷阿買是何人
山谷云退之姪必有所
據而云耳又有示姪湘詩

詳見牯
丹門

譽子姪

牧之譽阿宜義山譽衮師其後二子皆無聞

古今事文類聚後集卷七